

Date – 25/03/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- **Mizoram University convocation vawi 19-na chu vawiin khan hman a ni a, zirlai hlawhtling 7,724 te hnenah degree hlan a ni.**
- **Chief Minister Pu Lalduhoma chuan Mizoram University-ah Master of Law, LLM leh integrated LLB zirna siam thuai a ni dawn tih a sawi.**
- **Lok Sabha chuan Finance Bill,2025 a pass.**
- **Union Minister for Minority Affairs Kiren Rijiju chuan sawrkarin a chhinchhiah sakhaw tlemzawk parukte tan hmasawna tur scheme a siam tih a sawi.**

<><><>

MZU CONVOCATION

Mizoram University convocation vawi 19-na chu vawiin khan hman a ni a, zirlai hlawhtling 7,724 te hnenah degree hlan a ni.

He hunah hian Mizoram Governor General (Rtd) Vijay Kumar Singh chu khuallian niin, Chief Minister Pu Lalduhoma chu khualzahawm a ni a. Zirlai hlawhtlingte hnenah Degree, Gold Medal leh lawmman (Prize) te hlan hmasak a ni.

Mizoram Larsap General (Dr) Vijay Kumar Singh chuan thiamna nei tura tumruhna leh chhelna nena beitu zirlai hlawhtling thar zawng zawngte chu a lawmpui thu a sawi a, India ram chhung khawchhak tawpa awm, University atanga zirlai 7,724 te hnenah degree hlan a ni chu ropui a tih thu a sawi.

Larsap chuan MZU chu kum 2001-a central university-a hlan kai a nih hnuah thiamna (academy) leh zirchianna (research) ah chauh ni lovin khawtlang nun hmasawna leh state chhung hmun hrang hrang tihchak lamah a thawh hlawk hle tih a sawi a, MZU chuan hmasawn zelin, ram chhunga zirna in sang tehna hrang hrangah dinhmun tha tak tak a chang chu fakawm a tih thu a sawi.

Larsap chuan MZU-a zirtirtu hna thawk mek mi 5 te leh research scholar pakhat te Stanford University-in khawvela scientist tha zual a thlan chhuah zaa 2 zingah an tel chuan MZU chu khawvel huap zirna tha ni turin hmalam hun a nei eng hle tih a lantir tih a sawi baw.

Byte: Governor

Vawiina degree hlan takte hi - Doctor of Philosophy - 104, Master's Degree - 567, Master's Professional - 149, Bachelor's Degree - 143, Bachelor's Professional (B. Tech., B. Pharm, Nursing, OOT, RIT, MLT, LLB, BBA, B. Arch, B.Voc, BSW, B.Ed MMP, B.Ed.) - 176 niin a hmuna degree dawngtu kal zat chu 1192 an ni. A hmuna kal ve thei lo degree dawng zat chu 6532 niin tun tum convocation bika degree dawngtu zat hi zirlai 7724 an ni.

Zirlai hlawhtling degree nei thar zingah hian Gold Medalist 51 leh Book Prize Winner mi 3 an awm baw a ni. Vawiin inkhawmah hian Mizoram University Vice-

Chancellor, Prof. Dibakar Chandra Deka, khualzahawm Chief Minister Pu Lalduhoma leh Registrar, Professor Lalnundanga te pawhin thu an sawi a ni.
(Corr: Maremi)

<><><>

CM

Chief Minister Pu Lalduhoma chuan Mizoram University-ah Master of Law, LLM leh integrated LLB zirna siam thuai a ni dawn tih a sawi.
Vawiina Mizoram University convocation vawi 19-na neih a hman puinaah, khualzahawm Chief Minister Pu Lalduhoma chuan Mizoram University chu Act of Parliament hnuai a kum 2000 April ni 25 khan din niin, kum 2001 atangin a taka kalpui tan a ni a, hun rei lote chhungin hmarchhak biala University zinga tlo ber zingah a tel pha a, science, arts, commerce, management leh engineering lama zirna hrang hrang chawisan kawngah te a thawh hlawk hle a ti a. MZU-ah hian Master of Law, LLM leh integrated LLB course bakah Engineer zir laite tan general basic science leh humanities department siam thuai a ni dawn tih a sawi. He rawtna (porposal) hi UGC leh Union Education Ministry hnenah thawh a ni tawh a, tun dinhmuna a siamna tur sum (financial approval) ngah mek a ni a ti.

Byte: CM

Chief Minister chuan Mizorama zirna in sang ber a nih vangin, Mizoram University chuan zirlai leh researcher te tana thil thar leh hmachhawp siam kawngah hma a la chhonzawm zel a, rei lote chhung chauh la awm mah se hmasawna tam tak a tawng tawh a, chung zingah chuan National Assessment and Accreditation Council, NAAC chuan kum 2019 atanga kum 2024 inkarah khan Mizoram University chu Grade A an lo pe tawh tih a sawi a.
Mizoram university campus chu boruak leh leilung tana hlauhawm thlen lo, eco-friendly zirna kalpui tha ber zinga mi a nih avangin Mizoram pollution board chuan Green Audit Report a neihah A grade a pe tih sawiin, tun dinhmuna MZU-ah hian department hrang hranga research ti lai research scholar 1,277 an awm mek a, school of studies 9-ah department 37 a awm mek a, Mizoram University chu hmarchhak biala university zinga online course kalpui hmasa ber a ni tih a sawi bawk a ni.

<><><>

MAMIT WATER SUPPLY

Mamit khawpui chawmtu tur tui lak hna - Augmentation of Greater Mamit Water Supply Scheme Part-II (Clear Water) hna leh Tui lakna pipe hman lai chhe zual (2Km huam chhung) thlak hna thawh mek te leh tui dahkhawlna Tanky siam mek te chu tukin zing khan bialtu MLA Pu H. Lalziriana chuan a endik.
Augmentation of Greater Mamit Water Supply Scheme Part - II (Clear Water) hna hi DoNER hnuai North East Special Infrastructure Development scheme (NESIDS) atanga pawisa hmuh cheng vaibelchhe 40 hmangin Gangwal Infrastructure Pvt Ltd ten an thawk a, Phaizau Pump house atanga pipe zam hian Mamit Bazar veng thleng tawh in, Mamit khawpui chhung pipe phum hna thawh mek bawk a ni.
GMWSS Part-I (Raw Water) hnathawh chu zawhfel a nih hnuin kum 2022 July ni 6 khan hlawhtling taka pump chhin a lo ni tawh bawk.
Hetihlai hian, Tui lakna hman mek, pipe line chhe zual lai (Pump house atanga 2Kms huam chhung) thlak hna, AMRUT 2.0 atanga sum hmuh cheng vaibelchhe 3.11 hmanga thawh pawh ngawrh taka chhonzawm reng a ni a, Mamit

khawpuiin tui hnianghnar zawk a hmuh theihna tura hnathawh mekah, AGMWSS Part-II hmang hian kumin April thlaah chuan Tut tui pump chhuah theih ngei tum a ni.

MLA Pu H. Lalzirliana chuan Mamit PHED EE leh Staff-te thawhrimna fakawm a tiin an hnenah lawmthu a sawi bawk a ni.

(RD Thanzauva, Mamit PTC)

<><><>

MARKET

Venghlui khawtlang chu vawiin khan Aizawl Treasury Square Bazar kang taah thil zuar thinte thutna tur sa in an hnattlang.

Venghlui Local council member, term hmasaa local council chairman ni bawk Pu K. Lalhriatrenga chuan, bazar chu insawn turn Aizawl Municipal Corporation (AMC) lamin an ti thin tih a sawi a, mahse an ngaihdan leh duh dan thlen tura an tih te chu swi ho tura tih an nih laiin sawi hona an nei lo tih a sawi a, hei vang hian an beisei angin thil a thleng lo tih a sawi.

(Byte of Pu K. Lalhriatrenga)

Treasury Square-a Assembly House leh Directorate of Information & Public Relations inkar step-a chawhmeh bazar hi March ni 17 khan a kang a, hemi ni vek hian AMC Mayor Pu Lalrinenga Sailo chuan bazar hi sak that a nih tawh loh tur thu a lo sawi tawh a ni.

Hnattlang hi vawiin atan tlai dar 4 vel khan an duhtawh rih a, an chhunnawm leh chhunnawm loh chu Venghlui NGOCC Committee thu ang angin a ni dawn a, an aiawh pahnih khat chu AMC hnenah an kal a, AMC hnenah hian NGOCC thutkhawm hma chu thu leh hla an nei rih lo tih an hrilh a ni.

<><><>

RD MINISTER

Rural Development Minister Prof Lalnilawma chuan RD Department hnuaia hna thawkte chu hawihawm leh mipui tana dawr nuam bawk turin a chah.

He thu hi vawiina Thingsulthliah RD Block Office-a Thingsulthliah RD Block in kum 50 a tlin lawmna hunah sawiin, RD Minister chuan Thingsulthliah RD Block-in kum 50 hmel a hmu chu ropui a tih thu a sawi a. Rural Development Department chu thingtlang mite tihhmasawnna leh chawikanna atana hnathawh sawrkar department a ni a. Chuvangin, RD Department-a thawkte chu an hawihhawm tur a ni a, mipui tan dawr an nuam bawk tur a ni, a ti.

He hunah hian RD Minister chuan Thingtlang mite tan RD in hna tha taka a thawh chhunnawm zel theih nan mipui thlawpna leh thawhpuna pawh a pawimawh tih a sawi a. RD hnuaia hmalakna te a lo puitlina, RD hnuaia hnathawh te a that leh zualna turin a thawktute fuihin mipuite phungbawmna a sawm nghal bawk a ni.

Thingsulthliah RD Block hi kum 1947 March ni 1 khan hawn a ni a. A tirah chuan Community Development Block tih a ni a, kum 1984 khan RD Block tia thlak a ni. He RD Block-ah hian BDO hmasa ber chu Pu Rualkhama, AEO niin tun thlenga Thingsulthliah BDO awm tawh zat chu mi 33 an ni.

<><><>

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

CONGRESS

Mizoram Pradesh Congress chuan vawiin khan Mizoram University a Associate Professor Dr James LT. Thanga hoin Mizoram Budget 2025-26 zirchianna an nei.

Congress Bhavan-a hun hmanah Dr James LT. Thanga chuan, Inrenchem kum chu mipui ten sawkar kum 2015-2016 atang khan an hmelhriat tan tih a sawi a. Chu chuan a dawt leh sawrkar kumah khan nghawng tha tak a nei tih a lo lang tih sawiin, sum indaih lohna a lo tlahniam a, sum chuang-bang Surplus an tih a awm hial a, a ti a. Insiamthatna tak tak a awm chuan Revenue surplus hi a khawih a, chu chu hnathawhnaah a kal thei thin a ni tiin, sawrkar leiba tlingkhawm pawh nasa takin khatih lai khan a tlahniam a ni, a ti.

Dr James LT. Thanga chuan, tuna kan sawrkar hian sawrkar kum kal mekah hian Year of Consolidation an puang a, nakkumah a nghawng a lo lang chho dawn a ni tih sawiin. Tuna a landan chuan sawrkar hnathawk hlawh leh inrelbawlina hi inrenchem kum berah hian vaibelchhe 1500 zetin a pung a ni a ti a. Sawrkar hnathawk hlawh leh pension hlawh te chu sawrkarin a thunun theih loh thil, pek ngei ngei ngai a ni a, a bak lirthei leina, sawrkar chetvelna leh huau huau atana sum hman thunun theihah vaibelchhe sang chuangin a pung a, sawrkar hi a inrenchem lo hle niin a lang a, a pung nasa hle a ni, a ti. Kum kal mekah hian Sawrkar sum hmuh aia hman ral a punna hi a sang hle a, Revenue Deficit te a nei bawk a, chuvangin Year of Consilidation hi a hlawhtling lovah a ngaih theih a ni, tiin a sawi.

<><><>

FINANCE BILL

Lok Sabha chuan Finance Bill,2025 a pass. He bill hi sawrkar laipui tangka kum 2025-26 chhunga sum hman tur rawtna a ni a.Union Finance Minister Nirmala Sitharaman chuan zawhna chhangin Finance Bill 2025 chuan chhiah chawi thinte tan zangkhaina tur tam tak a pek tur thu a sawi a. Sumdawnna kawngah awlsamna a pe dawn tih a sawi a. Sawrkar chhiah lak dan tharah chuan cheng nuai 12 aia tlem lalut tan income tax pek a ngai tawh dawn lo tih a sawi a.Income tax bill thar hi fur session lehah sawiho a ni ang tih a sawi bawk a ni.

(Byte)

Vawiin Lok Sabha thutkhawmah hian Mahatma Gandhi National Rural Employment Guarantee Scheme (MNREGA) sum tikhawtlai vangin eptuten rorel thei loin house an siam a ni. Vawi engemawzat house rorel hi tihtawp a ni.

<><><>

MINORITY

Union Minister for Minority Affairs Kiren Rijiju chuan sawrkarin a chhinchhiah sakhaw tlem parukte tan hmasawnna tur scheme a siam tih a sawi.Vawiina New Delhi-a Conference of Minorities ah he thu hi sawiin Pu Rijiju chuan heng sakhaw tlem zawkte hian kum 2047-a India in ram changkang anih theihna turah an thawhhlawk hle a ni a ti a. Sawrkar laipui chuan notified community paruk -Muslim, Chrisitian, Sikh, Buddhist, Jains leh Zoroastrian te tan scheme tam tak a siam tih a sawi. Pu Rijiju chuan state minority commission tinte chu heng scheme te hi zirchiang a, a tihhlawhtin kawngah theihtawp chhuah turin a chah bawk a ni.

<><><>